

17. juli 2019

EM2019/31

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiuppara:

Qanoq iliorluni nunatsinni partiit amerlassusaasa amerlatikkiartorerisa killilersimaarneqarsinnaanera pillugu apeqquteqaat aallaavigalugu oqallisissiaq.

(Inatsisartuni ilaasorta, Henrik Fleischer, Siumut)

Tungavilersuut:

Kalaallit Nunatsinni isumaga malillugu Partiit amerlavallaarput. Tassami inuiaqatigiit 55 tusindtit sinneqalaaginnartut politikikkut sullinneqarnerat assut piffissamik annertuumik atuiffiuvoq akisullunilu, suliasallu Partiit amerlavallaarnerisa kingunerisaanik ingerlavallaarneq ajorput.

Naak qineqqusaartoqareeraluartoq suliasallu suliarineqartariaqaraluartut Inatsisartut Oqaluttarfiat isumaga malillugu assut qineqqusaarnermut atorineqartarpoq, tamannalu Partiit amerlavallaarnerannik tungaveqarsoraara.

Partiillu amerliartuinnarnerisa kingunerisaanik ataatsimiittarnerit sivitsoraluttuinnarlutillu talliarpuunartut, tamatumalu kingunerivaa atorfilittanik atuinerup annertusiartuinnarnera aamma allaffissuleraluttuinnarneq, Inuiaqatigiinnullu tamatuma kinguneranik akitsoraluttuinnarnera, tassami ullumikkut partiinut Inatsisartuni ilaasortaataqartunut Partiimut ataatsimut tungaviusumik tapiissut ukiumut 850 tusindtiulluni. Inatsisartuni ullumikkut partijusut naapertussagaanni taava partiinut tungaviusumik tapiissutit 6 millioningajaapput, tassungalu aamma ilaallutik partiit qinigaasa amerlassusaat (mandatit) immikkut tapiissutaasarmata aamma.

Isummat assigiinngissitaarneri eqqaassanngikkaanni taava partiit ilai tungaviusumik isummertarnermi imminut qanittuaraapput. Inatsisartuni ullumi partiit 7 isersimapput. Suli amerlanerusunik ilaqqittariaannaapput. Oqareernittuut tamanna inuiaqatigiinnut akisoorujussuovoq Inatsisartunilu suliniarnitsinnut akornusiilluni. Partiit qanorluunniit amerlatigisut pigileraluarutsigit, taava tungaviusumik pingasunngorlugit aggorneqarsinnaapput: Saamerliit, qiterliunerusut aamma talerperliit. Ajunnginnerpaamik inississagutta partiit pingasut naammapput – partiit saamerliit, qiterliit aamma talerperliit tamarmik ataatsimik parteeqarunik



naammapput. Ilimanarpallaangilaq tassunga killikkumaarnissarput, kisianni tassa ukiut kingullit naapertorlugit partiit amerlatsikkiartorput, taamaattumik isumaqarpunga piffissanngortoq eqqarsaatigissallugu, qanoq ililluta killiliisinnaanerluta.

Periarfissat ilaattut taaneqarsinnaavoq partiinut qineqqusaartussanut piunasaqaatit sakkortusinerisigut, ajornartorsiut aqqinneqarsinnaasoq. Ullumikkut parti nutaaq sassariaannaavoq, qinigassanngortitsisunik ima amerlatigisunik katersisinnaappata, kingullermik qinersinermi taasisut akuerisaasut 1/31-iuppata, taamaalilluni partii minnerpaamik ataatsimik isertitaqarsinnaammat. Tamanna pivisumi isumaqarpoq qinersisartut 900 atsiortissagaat. Taamatut atsionernik katersiniarneq ajornakusoorpallaarsimanngilaq. Tassanerpiaq immaqa eqqarsaatigisinnaavarput piunasaqaataasut sakkortusisissanerlugit, imaalillugu partii nutaaq qineqqusaarniarpat uppersartariaqaraa qinikkanik minnerpaamik marlunnik qinigassanngortitsisinnaallutik.

Periarfissaq alla aamma tassaavoq qinersisitsisinnaanerup ammut killinga atuutsinneqalersinnaasoq, taamaaliluni partii qineqqusaaqqusaasoq Inatsisartuni isersinnaanngimmat soorlu assersuutigalugu partiimi qinerneqartut marlunniit ikinneruppata.

Naggataatigut erseqqissarlara, apeqquteqaat aallavigalugu oqallinnissap siunertarinngimmagu partiit aalajangersimasut atasariaqanngitsut. Kissaatiga uaniippoq, tunngaviusumik oqaluserissagipput qanoq ililluta partiit amerlatsikkiartortut ikilisarsinnaanerivut, taamaalilluta partiit amerlavallaanerisigut inuiaqatigiit aningaasatai atornerlunneqannginniassammata aammalu Inatsisartuni suliniarnitsinni akornutaanatik.

Neriuppunga ajunngitsumik oqallittoqarumaartoq